

當代名人事略

凡例

一 名人中有尙屬健存者有已歸凋謝者凋謝者固當詳其事實以詔來茲健存者方有無限之功名事業似不當遽列諸篇然崇拜英雄各有志願且當改革之際其例或可稍寬故是編以健存者列入上卷凋謝者列入下卷

一 下卷中所列溫生才陳敬岳之歷史與他本不同又溫生才與徐錫麟吳祿貞之歷史雖已著於暗殺史中然彼此亦不同蓋各事蹟俱向海內記述家徵集而來故不慮其重複也

一 敘述名人事略與史體有別史無論賢奸但有關係者皆錄之此編意主揚善故所列者皆偉大人物

一 公私著述有挾恩怨於其間者卽其書可焚焉此編所錄之名人雖是非不能一

致悉俟公論而定然於編者胸中實無意見幸邦人君子有以辨之
一名人事蹟自徵集以來已盈編累牘美不勝收茲因限於篇幅故先擇要錄之餘
俟異日再出單行本閱者幸弗譏爲挂一漏萬焉

中華民國元年十一月

編者識

當代名人略卷上

目錄

袁世凱

孫文

黎元洪

黃興

陸徵祥

唐紹儀

段祺瑞

孫武

朱瑞

王天縱

劉之潔

李顯謨

當代名人事略 卷上

袁世凱

袁世凱字慰亭。第二任之大總統也。世籍河南項城縣。近遷輝縣。爲滿清河道總督。甲三之姪孫。侍郎保恒之姪。江蘇道員保慶之子。初應童子試。不獲薦。引以爲憾。其伯父保緒。方爲津海關道。往依之。時合肥李鴻章鎮北洋。君以通家禮謁見。合肥賞之。欲畀以事。保緒謂合肥曰。吾姪跼蹐。必敗事。請勿用。合肥熟視保緒曰。爾薄爾姪耶。吾以爲是人。將來功名事業。當百倍爾也。其見重於先達如此。顧君自忖。雖不得以科名進。何不可以他途入。遂欲納粟爲同知。苦無貲。得安徽周馥之助。因捐同知。在直隸候補。聞廬江吳長慶駐師朝鮮漢城。君因有世交誼。往謁之。廬江命在營務處辦事。值朝鮮東學黨作亂。中國駐朝鮮之商務委員。爲香山陳氏。其職務若今之公使然。適困於城中。君督師往援之。見一少年乘馬挾槍。正饒陳氏而出。詢之。則唐

紹儀也。唐方爲朝鮮關口西人記室。與陳氏同鄉。甚密。聞警。故往護之。自是彼此互相訴慕。約爲兄弟。旋君以道員充商務委員。邀唐爲助者有年。情誼蓋益篤矣。甲午中日構釁。君於是時仍在朝鮮。見日人屢渡師。君亦屢請兵。合肥乃奏請命葉志超、衛汝貴等相繼率兵往朝鮮備戰。而意實主和議。君迭請宣戰。皆不許。乃電請歸國。而陳敵情。舉唐紹儀自代。遂歸於天津。未幾。中日和議成。合肥大不理於口。罷鎮。閒居京師。君亦惓惓無聊。暫以京師爲駐足地。時康有爲懲甲午之敗。力倡變法。維新者爭附之。君以編修張孝謙之介紹。獲交康氏。大相得。遂與李盛鐸、夏強學會於京師。李旋與康氏有違言。遽揭參之。乃罷強學會。改官書局。以壽州孫家鼐督之。君亦旋授浙江溫處道。將之任。而直隸總督王文韶堅留之。使練北洋兵。尋授直隸按察使。亦不赴任。仍注力於練兵事。歲戊戌。清德宗銳意變法。信任康氏。惟屈於母后之勢。不敢遽登顯之陽。以譚嗣同、楊銳、劉光第、林旭爲京卿。令入軍機處辦事。陰皆決之於康氏。其時譚嗣同倡言皇上權力太弱。政令不行者。以無重兵。強將擁護之耳。

諸將之已貴者。思保祿位。求附太后。不足與謀。今若擇一有才望而位未貴者。驟顯之。則必感激效力。林旭方屬意於董福祥。嗣同謂其驕悍不可恃。康氏因與君有舊。稱君才。乃決召君。既召見。德宗獎勉有加。翌日。卽有以侍郎候補充練兵大臣之命。是時守舊諸臣。痛詆變法。已密議請孝欽后垂簾。而御史楊崇伊聞命之日。詣榮祿告急。榮祿以孝欽后內姪。出鎮北洋。纔數月。見君至。嚴詰之。語秘。世莫得聞。榮祿卽以北洋公事。請君代折代行。而已則星夜晉京。謁孝欽后。定垂簾之議。逮捕康氏黨。學士黃紹箕。先有所聞。走告康氏。乃急行。四京卿並被逮。旋駢戮之。榮祿入長樞府。以裕祿代鎮北洋。君亦被命爲山東巡撫。先是德人以曹州教士被殺案。強踞膠州灣。迫脅太甚。山東人恨之刺骨。拳匪乘機而起。昌言仇教。假託神怪。愚民靡然從之。巡撫毓賢。信之尤甚。於是徧於山東直隸間。迨君撫山東。試其術。破之。遂飭武衛軍痛剿。庚子夏。拳匪集京津間。召八國聯軍之禍。償款至四百餘兆。而山東境內一律肅清者。君之力也。山東人士至今猶稱道之。辛丑冬。兩宮自西安回鑾。重君之能。旋

授爲北洋大臣。君憤國勢日弱。於甲辰間。首以立憲之說進。至乙巳。而日俄戰局終。日以立憲勝。俄以專制敗。於是激動我國朝野感情。立憲之談。繼君而起。迨俄國亦議行立憲。駐法使臣孫寶琦。遂奏請改易政體。詳言立憲之利。無何。君與鄂督張之洞。江督周馥。有十二年後。實行立憲之奏。六月中。君復奏請考求各國憲法。於是五大臣出洋之命。尋又與張之洞聯銜。疏請廢科舉。立學校。又奏請外官實缺。須先赴日本。遊歷三月。方許履任。中國氣象。煥然一新矣。既君任外務部尙書。且與張之洞。同在樞府。而慶親王奕劻。所倚重者。惟在君。凡諸要政。君先與奕劻定議。奕劻入告行之。張之洞。雖欲持異議。恆無及矣。惟張之洞。以翰林持朝局之風氣者十年。以督撫當世變之要衝者三十年。負士望久。故當時士論。輒左袒之。實則張之洞之見事遲。遜於君之敏也。特以其久任封圻。故孝欽后亦間采其議。而權較絀耳。戊申十月二十一日。德宗崩。越一日。孝欽后亦崩。兩遭大喪。海內震動。東南士論。更誣及君。而起視清廷。方加慶親王奕劻。世襲罔替。君與張之洞。並加太子太保銜焉。嗣以隆

裕后之不嫌於君。有張翼者。舊事醇賢親王奕譞。而爲福晉所倚任之人也。因有夙嫌於君。益譖之於福晉。並告攝政王載灃。欲治君罪。載灃本爲德宗異母弟。且感孝欽后厚恩。性又異懦。不欲翻戊戌舊案。故僅假足疾。命君解軍機大臣。以那桐代之。解外務部尙書。以梁敦彥代之也。中外之未悉底蘊者。於命下之日。猶以爲將興大獄。尙侍督撫中之被君薦剡者。至是亦人人自危。南北報章。又且褻君罪狀。豈知命下第三日。君已出都歸鄉里矣。歸後。營別墅於彰德城外。棲息墅中。不入城市。閒以詩自娛。嘗製漁翁小影。簑笠持竿。悠然自放焉。辛亥四月。改軍機處爲內閣。盛宣懷爲國務大臣。開閣不數日。卽有商辦鐵路。收歸國有之命。湘粵川鄂人士。聞而抗之。相激相盪。遂以釀成武昌八月十九之變。清廷計無所施。仍起用君。君屢辭不獲。乃復出山。時論方痛責君。謂將殺漢人以媚滿。然君於被命時。固已言朝廷自激民變。不當復勦國民。以促其亡矣。故其督師南下也。甫抵信陽。卽遣使入鄂。議息兵。黎元洪執不可。反勸君速表同情。舉兵北向。君以爲是將啓清廷之疑也。亦拒之。會張紹

曾等五將聯合上書。列十九條。請讓權國民。實行立憲。不從。則以兵入都。清廷爲所
懾。乃付資政院議決。宣布十九信條。各親貴同時謝職。奕助力請授君政權。以支危
局。於是有內閣總理大臣之命。且電促入都。君謂據十九信條。總理須由國民公舉。
故不敢奉詔。乃權由資政院追舉。而君始以九月二十二至都。織內組閣焉。惟是時
所舉國務大臣。大率不願就職。且東南諸省。皆已宣告獨立。南軍雖失漢陽。北軍亦
失江甯。戰事延長。海內蒙禍。英國駐漢領事。出任調停。介南北言和。君以息兵。早議
及此。因南軍不允。故中止。茲以外人復提議。遂奏請派唐紹儀爲全權代表。南下商
權。唐至漢口。以南軍代表伍廷芳不肯至。要議於上海。乃折而至滬。會議數次。議決
四條。紹儀與庭芳各簽約。由電告君。君以君主民主意見不合。且聞南京已舉孫文
爲總統。遂電撤唐代表。與伍君直接電商。廷芳堅持初約。不允改議。兩方爭辯良久。
嗣以借款無成。軍餉奇絀。由君勸北中諸將。請建共和政體。爲隆裕后所允。遂互議
優待皇室條件。議決。由清廷宣布遜位諭旨。南方臨時總統孫文亦宣告辭職。嗣以

君之富於政治經驗。足收南北統一之效。故舉爲第二任總統。君於元年陽曆三月初十日。舉行受職禮云。

孫文

孫文。字逸仙。號中山。廣東香山縣人。先世業農。君幼時亦繼其業。稍長。改就商。暇則讀漢籍。學英語。以爲常。不數載。獲資鉅萬。英語亦嫻熟。乃至香港。入博濟醫院。受業於美人康德利。學成。在澳門設局。獨注意於貧病。得土著信任。葡萄牙醫士嫉之。甚思中傷之。君素抱憂世志。欲糾合同志。鼓吹革命主義。因決計棄醫。歸鄉里。與陸皓東、楊飛鴻等。創立興中會。無何。清日起衅。君以時機可乘。竊購軍火藥彈。爲一切之準備。既聞馬關條約成。恐機會坐失。勢成騎虎。遂集師於汕頭西河香港三處。令其黨潛入省垣。謀一舉奪廣東。不料隱謀忽露。遭清兵之逆擊。陸皓東等數人。遂罹禍。而君僅以身免。逸於澳門。密航香港。而東渡焉。既抵橫濱。剪髮易服。尋航布哇。達美國。轉而至英之倫敦。爲清公使龔照璦所偵知。誘入使館。幽之。其師康德利。適歸倫

數聞其事。極力營救。因英之總理大臣薩利斯倍立。屢向龔照璦交涉。始得釋君。乃著一書。歷叙囚禁之顛末。並略表謝忱。鐫板行之。乃別英倫。復遊日本。與日人平三周及宮崎寅藏。可兒長一等。相遇于逆旅。互訂秘密。會戊戌變政起。康有爲與其徒梁啓超。亦匿避至日。與君黨見不合。動輒相持。平山宮崎等欲調和之。卒無效。迨庚子拳亂作。康黨之唐才常輩。謀舉事於漢口。君亦親赴臺灣。促同志舉義于廣東。與三合會首鄭弼臣等。攻略惠州。次第失敗。志不得遂。僅於長江流域。略植革黨之勢力而已。未幾。拳亂平。清廷思大興教育。游學日本者驟衆。君復至日本。結納留學生。爲中華革命大團體之計畫。於是始識黃興。立談之間。意氣相合。遂與胡衍鴻、汪兆銘、陳天華、宋教仁等。謀推倒清政府。因組織中國同盟會。君爲領袖。辛亥八月。武昌革命突起。全國響應。復江寧後。暫以爲臨時政府。由十七省代表之選舉。君爲第一任大總統。及清帝退位後。君亦讓職與袁世凱焉。

新史氏曰。孫氏殆所謂有四千年歷史以來。及中國傑出之一人哉。方其苦專制之

束縛。思以脫離之惡。異族之驕橫。思有以掃除之。屢起屢仆。至流離海外。奔走呼號。而氣不餒志不灰。數十年如一日。是謂有豪俠骨。迨夫漢上風雲。震盪全國。河山光復。大業垂成。乃獨於爭權奪利。膠膠擾擾之秋。謝總統而不居。歸林泉以自適。是謂有仙佛心。或以孫氏之革命。比之湯武。尙未能深知孫氏者也。蓋湯武猶有利天下之心。孫氏則視天下如敝屣。其位置直高出湯武上。論者謂孫氏與美國之華盛頓相匹敵。其殆庶幾乎。

黎元洪

副總統黎元洪。字宋卿。湖北黃陂北鄉人也。父朝相。從清提督鮑春霆之軍起家。累官至參將。久筦北洋軍隊。卒於軍。君生時。當民國紀元前四十七年乙丑。貌凝重。長僅中人。然沉毅持大體。能堅忍勝人。年十八。投身入天津水師學堂。習海軍。五載學成。甲午。清日和議定。清總督南皮張之洞。任兩江。籌善後計。建築金陵各新式礮臺。以君係水師學生。特聘主其事。旋署要塞司令官。南皮雅號知人。於海內英俊。多所

獎借。顧尤奇君。曰是謹厚者。終當斷大計。不僅武略之長也。故軍府事。輒以諮之。越一年。之洞移督武昌。創練新軍。以君與德國武員充新軍教練。久之。赴日本附近衛師團見習。歷三載。返武昌。充騎兵隊長。凡四年。歷充江陰水陸大操指揮官。前鋒步隊四營統帶。代理湖北常備軍第二鎮統領。丁未。新軍制度編定。表君爲陸軍第二十一混成協統領。兼管長江艦隊。兼陸軍學堂會辦。兵工鑄藥兩廠監督。是年秋。充彰德秋操臨時統制官。已酉。率本協參與太湖秋操。君以鄂人筦兵本省。近二十年。雖名位亞於張彪。然慈意率下。軍心樂爲之死。鄂中士大夫。識與不識。皆曰黎協統長者。故倉卒之際。足以攝人心。鑒衆望者。實惟君一人。辛亥八月十九日。鄂軍倡義。克武昌。謀民國共和。共推君爲鄂軍都督。先是。清帝以滿族入主中原。乾嘉以後。漸以不振。光緒季年。滿人黠者。復假立憲名。集權中央。鈐制漢族。親貴少年。乳臭小兒。筦樞部。鐵路國有事起。盛宣懷以郵傳尙書主借外債。國民爭者。輒以殺勿赦。川湘之地。民怨沸騰。旗人瑞澂督湖廣。日以捕殺黨人爲事。鄂軍舊與黨部聯。會黨事洩。

彭楚藩等誅更連日閉城大索餘黨。黨部戒嚴。乃於是夜啓省垣門。迎入砲隊營。會集工程隊。攻督署。瑞澂先已與張彪遁。平明。軍尙無主。乃議所以爲都督者。僉曰。黎協統賢明而仁。且素負共和之志。非是莫可當也。乃共造協統處謁君。方變初起。君聞之。秉燭而待。有軍士闖門入。君按劍起叱曰。若屬將何爲。欲爲亂耶。斫吾頭去。吾死不能從。曰不然。吾屬冒萬死。凡爲公益耳。君曰。嘻。此吾志也。於是謁者迎君。君乃騎而至諮議局。省中官紳聞君出。亦稍稍集。遂決議奉君爲都督。都督視事一日。首先下令。申約束。凡軍士妄殺者有誅。以湖北諮議局爲鄂軍都督府。設軍務。交通。理財。政事。四部分掌府事。遣別將收復夏口漢陽。更議分兵扼守田家鎮。武勝關。斷敵人南北進兵之路。用黃帝紀年。革清帝宣統年號。稱其三年。爲黃帝紀元。四千六百零九年。移檄四方。宣布罪狀。操練新軍。派員聯絡各省。共圖興復。會師北征。部署一新。人心大定。

漢口故通商鎮。外國領事在焉。張彪遁之漢口。藏身租界。招納亡命。將不利於武昌。

都督以書招之降。不聽。因照會各國領事。請守中立。並諭商民無恐。外人以鄂軍舉動文明。且與張彪戰。又三捷。乃首由俄領事。會同各國領事。正式宣告。嚴守中立。自起義至此。僅五日。得認爲交戰團。前例所無也。九月初。九江響應。遣使與鄂軍相聯。湖南亦自獨立。清廷下詔罪已。起袁世凱爲內閣總理大臣。旋以馮國璋代蔭昌。進攻湖北。是時鄂軍先事出防四川。所留者多由新募。與戰頗不利。然民心附漢。商民多傾貲助餉。國璋至。籌捐不應。啣之。因乘進攻時。縱軍士焚燒漢口市。於時煙焰彌空。日光晝晦。全鎮頓成墟莽。商民損失財產。以數千萬計。外人交口唾罵。謂慘無人道之極。由是全國騷然。贛、皖、蘇、越、閩、粵、滇、黔、桂、晉、秦、齊諸省。相繼宣布獨立。長江上下游。惟南京未下。四川惴惴自保。滿清之亡。自是決矣。十月初七日。北軍襲漢陽。初漢口爲北軍得後。進逼漢陽。勢頗岌岌。湖南人黃興適至。興著名黨部。能堅苦爲士卒先。都督爲統一兵柄計。築壇蛇山前。親授劍印。拜之爲鄂軍總司令官。任興以漢陽攻守之事。興與敵軍相持已一月。至是爲漢奸所敗。乘夜渡江。會軍府僚佐議曰。

漢陽之敗。特士不用命耳。興無過。然守難於攻。攻以一人敵十。守則十人防一。故棄漢陽不守。興之意也。今漢陽既失。敵必進攻武昌。興以爲困守武昌無益也。不如出駐武昌下遊。以空城誘敵。返守爲攻。更以奇兵攻取南京爲根據。無何。南京光復。議遂不行。方是時。全國軍艦俱已歸附民軍。贛粵援軍相次齎集。鄂軍編爲六鎮。畫區而守沿江百里之地。主客之兵不下六七萬人。都督以漢陽失利。由於湘鄂軍士不和。故漢奸得乘間輸款於敵。今主客勢倍。再蹈覆轍。則武昌不保。因出駐洪山。隨營檢閱。歷青山三日而返。已而停戰議起。停戰者。本出於英國領事之調停。然北軍雖據漢陽。南京隨爲民軍所克。長江上下數千里。聲氣盡通。願戰之士奮氣十倍。北軍僅居陽夏一隅。且祇有京漢一綫歸路。又以餉源窘竭。軍無鬥心。故迫而言和。十一月十四省代表公推都督爲中央軍政府。大都督代表全國媾和事宜。代表會又以海陸兵權宜歸統一。湖北起義爲各省先。大都督名望日隆。公推爲海陸軍大元帥。黃興副之。時鄂中軍務方殷。議和地點決在上海。大都督坐鎮軍府。特委任博士伍